

Ini Sa Igsulat I ISDELA

Ini Denu Sa Igsulat I Isdela

Si Isdela sa sebaen tegesimbà diyà si Nemula. Egoh di nekeuma pitu pulù gepalay sa lugay sa etaw Hudiyu mig-ugpà diyà sa tanà Babiloniya, pinandayà sa datù tegePélsiya kagda anì mebaluy lumikù da diyà sa hagda menuwa Hélusalém, enù ka nesakupan ma sa tanà Babiloniya diyà sa hagdi kedatuan. Agulé migpelikù sa medoo Hudiyu owoy binaelan da dulì sa Dalesan i Nemula. Egoh di neubus dé, migpelikù ma Isdela i anì tuluen di kagda sa medoo uledin i Nemula owoy sa nesugat ukit kesimbà da ma.

Ini Sa Egoh I Datù Silo Migpepelikù Sa Medoo TegeHuda

1 ¹Na, egoh sa muna palay egoh i Silo migkedatù diyà sa tanà Pélsiya, igpetuu i Datù Nemula sa inikagi di tinulon i Hilimiyas sa tegesugkow kagi di egoh anay. Danà sa Suguy i Nemula migluhub diyà si Datù Silo, huenan di igpesulat di sa uledin owoy igpetiig di diyà sa langun etaw nesakupan sa kedatuan di.

²Ini sa kagi igpesulat i Datù Silo tegePélsiya, guwaen di, “Na, danà i Datù Nemula sa Nemula diyà langit, huenan di migkedatù a diyà sa langun balangan tanà diyà siini sinukub langit. Owoy igsugù di kenak ipebael sa Dalesan di dutu Hélusalém dò diyà sa tanà Huda. ³Ungayà ku umunut-unut Nemula i diyà keniyu i medoo etaw di. Mepion amuk pelikù yu langun umangay diyà Hélusalém dutu tanà Huda dò anì mebaelan yu dema sa Dalesan i Datù Nemula, sa Nemula egpenemulawen sa medoo tegeIslaél dutu Hélusalém dò. ⁴Na, sa medoo tegeIslaél nesamà diyà sa muni dé menuwa, mepion amuk mebegayan sa liyu etaw kagda pilak owoy bulawan owoy sa langun taman owoy hinagtay owoy sa ibegay da uloy atang gamiten diyà sa Dalesan i Nemula dutu Hélusalém dò.”

⁵Na, sa langun etaw nebegayan i Nemula megaen pedu, lapeg sa medoo ulu-ulu tugod i Huda owoy sa medoo ulu-ulu tugod i Bénhamin

owoy sa medoo tegesimbà owoy sa medoo tugod i Lebi, eg-igkes da langun mipanaw anì baelan da dulì sa Dalesan i Datù Nemula dutu Hélusalém dò. ⁶Agulé migtabang sa medoo duma da nessedapag dalesan, huenan di migbegay da diyà kenagda sa medoo sangkap pilak owoy bulawan owoy sa medoo hinagtay owoy sa medoo liyu mapulù langun taman, owoy sa langun ibegay da uloy atang gamiten diyà sa Dalesan i Nemula.

⁷Hê, igpelikù i Datù Silo ma sa medoo langun taman kinuwa i Datù Nabokonosol diyà sa Dalesan i Nemula dutu Hélusalém dò egoh anay sa igtagù di diyà sa dalesan sa hagdi egpenemulawen. ⁸Igsalig i Datù Silo iya wé medoo langun taman diyà si Mitelida sa tegeipat pilak diyà sa tanà Pélsiya. Agulé binilang i Mitelida anì ibegay di diyà si Sibasal sa ulu-ulu diyà sa tanà Huda.

⁹⁻¹⁰Na, ini kedoo sa langun taman igbegay i Datù Silo: telu pulù sa pelanggana anan bulawan, owoy sengibu sa pelanggana anan pilak, owoy duwa pulù owoy siyow sa ilùilù anan pilak ma, owoy telu pulù sa melikungkung anan bulawan, owoy epat gatus sepulù sa melikungkung anan pilak, owoy sengibu ma kedoo sa liyu langun taman. ¹¹Hê, lima ngibu epat gatus lapin sa kedoo langun taman pilak owoy bulawan igpeipat da diyà si Sibasal anì uwiten di amuk egpelikù da Hélusalém dò kedu diyà sa tanà Babiloniya.

Ini Sa Egoh Da Mig-edung Dema Egbegay Sa Atang Ulowen Diyà Si Nemula

3 ¹Na, egoh di neuma sa kepitu di gebulan diyà sa hagda palay, eg-ugpà dé sa medoo tegeIslaél diyà sa hagda munoy menuwa. Hê, nesetipon da langun dutu Hélusalém dò. ²Agulé mig-edung da egbael dulì sa atung kenà da eg-ulow sa atang ibegay da diyà si Nemula, sa Nemula egpigtuuwen sa medoo tegeIslaél. Iya sa egbaelan da anì megay da dahiya sa igbegay da atang ulowen, iling sa uledin igsugkow i Mosis sa etaw egsugùsuguen i Nemula egoh anay. Na, iya sa ulu-ulu da egbael si Hosuwa anak i Hasadak owoy sa medoo duma di tegesimbà owoy si Solobabel anak i Salatiyé lapeg sa medoo duma di. ³Apiya di pa egkelimedangan da diyà sa medoo liyu etaw eg-ugpà medapag diyà sa kenà da, binaelan da doo dulì sa atung kenà da eg-ulow sa atang ibegay diyà si Nemula diyà sa tapay kenà di. Uman agdaw amuk magtu kesimag owoy amuk mahapun, igbegay da sa atang ulowen, iling sa uledin igsugkow i Mosis egoh anay.

⁴Na, egbaelan da ma sa Pista Lawì nekeunut diyà sa uledin igsugkow i Mosis, owoy uman agdaw ibegay da ma sa taman kedoo ulowen igsugù diyà sa uledin.^a ⁵Takà da ma egbegay sa atang ulowen igsugù diyà sa

^a 3:4 Mebasa sa denu Pista Lawì diyà sa libelu Kebilang 29:12-38.

uledin, owoy ibegay da ma sa atang ibegay amuk magtu sebang bulan owoy amuk meuma sa medoo liyu pista igsugù i Nemula. Owoy duen ma sa igbegay da uloy diyà si Datù Nemula legkang diyà sa pedu da. ⁶Agulé egoh sa muna agdaw diyà sa kepitu di gebulan, eg-edung da dé egbegay sa medoo atang ulowen diyà si Nemula, apiya di pa endà pelà nebaelan da duu dulì sa Dalesan i Datù Nemula.

Ini Sa Egoh Da Egbael Dulì Sa Dalesan I Nemula

⁷Agulé eg sukayan da pilak sa medoo atung tumipak batu owoy sa medoo panday. Owoy binegayan da ma kaenen owoy inemen owoy lana olibu sa medoo tegeSidon owoy sa medoo tegeTilo. Iya sa binaelan da anì uwiten da sa medoo kayu sidelo kedu diyà sa tanà Libano umukit diyà dagat mangay diyà sa menuwa Hopi, enù ka iya sa igsugù i Datù Silo tegePélsiya.

⁸Na, mig-edung da egdulì egbael sa Dalesan i Nemula egoh sa keduwa di gebulan diyà sa keduwa di gepalay edung sa egoh da miglikù diyà Hélusalém.^b Iya sa ulu-ulu da si Solobabel anak i Salatiyé l owoy si Hosuwa anak i Hosadak. Egtabang ma sa medoo duma da tegesimbà owoy sa medoo tugod i Lebi owoy sa langun tegeIslaél nekepelikù diyà Hélusalém kedu diyà sa kenà da nesigkem. Ginela da ma sa medoo tugod i Lebi umedung duwa pulù gepalay sa idad da anì kagda sa tegetunggu diyà sa kegalebek sa Dalesan i Nemula. ⁹Na, ini sa medoo kaunutan sa medoo tegegalebek diyà sa Dalesan i Nemula, si Hosuwa owoy sa medoo anak di lapeg sa medoo duma telahadi di, owoy si Kadmiyé l lapeg sa medoo anak di anan tugod i Huda.^c Owoy hediya ma sa medoo duma tugod i Lebi kedu diyà sa malayan i Hinadad.

¹⁰Na, egoh sa medoo panday migtenà dé sa petigdegan bugsud sa Dalesan i Nemula, migpedapag sa medoo tegesimbà épê tegbuli owoy tapay da dé migkawal sa kawal sa tegesimbà. Mig-uwit ma dalemetan sa medoo tugod i Asap anan tugod i Lebi anì oloen da Nemula i, iling sa igsugù i Dabid sa datù diyà tanà Islaél egoh anay. ¹¹Agulé egduyuy da eg-olò si Datù Nemula owoy egpesalamat da ma, guwaen da, “Mepion Datù Nemula i, owoy endà mekedan sa dakel kehidu di diyà sa medoo tegeIslaél taman melugay.” Hê, tigtu pinetaled sa langun etaw sa keolò da si Datù Nemula, enù ka neketenà dé sa petigdegan bugsud sa Dalesan i Nemula.

¹²Dodoo duen ma sa medoo lukes tegesimbà owoy tugod i Lebi owoy kaunutan diyà sa menuwa sa mighaa sa muna Dalesan i Nemula egoh

^b **3:8** Mig-edung da egbael egoh Abelil ataw ka Mayu egoh sa lima latuh telu pulù owoy enem gepalay egoh i Hésus endà pa neetaw diyà tanà. ^c **3:9** Mebaluy ma guwaen di tugod i Hodabiya.

anay. Migpetaled da egsinegaw egoh da eghaa neketenà dé sa petigdegan bugsud sa magtu Dalesan i Nemula enù ka tigtu da egkeanggan. Dodoo eglukiyang ma sa medoo liyu etaw danà da tigtu egkeanggan. ¹³Dodoo endà netiigan di tayu sa etaw egpetaled egsinegaw ataw ka sa egpetaled eglukiyang danà da egkeanggan, enù ka tigtu metaled sa keikagi da. Huenan di, egdinegen dutu mediyù dò.

Ini Sa Egoh Da Nehawidan Egbael Sa Dalesan I Nemula

(Isdela 4:1-5,24)

4 ¹Na, sa medoo kuntelà sa medoo tegeHuda owoy tegeBénhamin, nedineg da sa egoh sa medoo etaw migpelikù kedu Babiloniya dò anì baelan da dulì sa Dalesan i Datù Nemula, sa Nemula egpigtuuwen sa medoo tegeIslaél. ²Huenan di, mig-angay sa medoo kuntelà da diyà si Solobabel owoy diyà sa medoo дума di ulu-ulu. Mig-ikagi da diyà kenagda, guwaen da, “Pebulig yu kami petigdeg sa Dalesan sa Nemula yu, enù ka egsimbà ké ma diyà kenagdi. Edung sa egoh i Datù Isaldad tegeAsiliya mig-uwit kenami dini, takà ké ma egbegay sa hinagtay egulowen ké diyà si Nemula.”

³Dodoo mig-ikagi Solobabel i owoy si Hosuwa owoy sa medoo дума da ulu-ulu tegeIslaél, guwaen da, “Endà duen sa niyu diyà ini i galebek. Kami polo sa mael dulì sa Dalesan i Nemula, sa Nemula egpigtuuwen sa medoo tegeIslaél, enù ka iya sa igsugù i Datù Silo tegePélsiya diyà kenami.”

⁴Agulé egsemeken sa medoo kuntelà da sa medoo etaw tegeHuda, owoy eglimedangen da ma kagda anì sumabuh da mael sa Dalesan i Nemula. ⁵Owoy egbegayan da ma pilak sa medoo ulu-ulu tegePélsiya anì endà mekelagbas sa kebael da sa Dalesan i Nemula. Iya sa egbaelan da takà taman sa lugay i Silo migkedatù diyà sa tanà Pélsiya owoy taman ma sa egoh i Daliyu tegePélsiya neketuhì migkedatù.

²⁴Huenan di, nekesabuh sa medoo tegeHuda egbael sa Dalesan i Nemula diyà sa menuwa Hélusalém. Endà dé mekebael da uman taman sa keduwa di gepalay egoh i Daliyu tegePélsiya migkedatù.

Ini Sa Egoh Da Mig-edung Dema Egbael Sa Dalesan I Nemula

(Isdela 5:1-13,17)

5 ¹Na, egoh iya, duen sa duwa tegesugkow kagi i Nemula, si Hagiyo owoy si Sakaliyas bébê i Ido. Tinulon da sa medoo kagi igpesugkow i Nemula, sa Nemula egpigtuuwen sa medoo tegeIslaél, owoy inikagiyan da sa medoo Hudiyu eg-ugpà diyà sa tanà Huda owoy diyà sa menuwa Hélusalém. ²Huenan di, si Solobabel anak i SalatiyéI owoy si Hosuwa anak i Hosadak,

migpelagbas da egbael dulì sa Dalesan i Nemula diyà Hélusalém. Egoh da eggalebek, egbuligan sa duwa tegesugkow kagi i Nemula ma kagda.

³Dodoo si Tatenayi sa ulu-ulu diyà sa pelubinsiya denu eledan agdaw amuk diyà ki sa lawa't wayeg Upelatis owoy si Sital Bosinayi owoy sa medoo duma da ulu-ulu, mig-angay da diyà sa menuwa Hélusalém. Mig-igsà da diyà sa medoo etaw, guwaen da, “Ngadan di etaw sa migsugù keniyu anì baelan yu dulì siini Dalesan i Nemula? ⁴Tulon yu diyà kenami ngadan sa langun etaw egpetigdeg siini Dalesan.”

⁵Dodoo si Nemula sa egtulik sa medoo ulu-ulu etaw Hudiyu, huenan di endà mehawidan da egbael sa Dalesan i Nemula taman sa egoh da i Tatenayi migsulat diyà si Datù Daliyu owoy sa egoh da ma meketiig sa sagbì di.

⁶Na, si Tatenayi sa ulu-ulu diyà sa pelubinsiya denu eledan agdaw owoy si Sital Bosinayi owoy sa medoo duma da ulu-ulu, migpeuwit da sulat diyà si Datù Daliyu. ⁷Ini sa kagi sa sulat da, guwaen da, “O Datù Daliyu, ungayà ké kumetanà sa keugpà yu. ⁸O Datù, egtulonon ké diyà keniko sa egoh ké mig-angay diyà sa tanà Huda. Hinaa ké dutu sa kebael da sa Dalesan i Nemula, sa Nemula épê dakel egkegaga. Duen sa dakel batu sinelogsudlogsud da diyà sa kelatkat di, owoy eg-ahayan da ma kayu. Tigtu da eg-udes eggalebek, huenan di metéél egkeubus sa kebael da. ⁹Mig-igsà ké diyà sa medoo ulu-ulu da ngadan sa etaw migsugù kenagda egpetigdeg iya wé Dalesan. ¹⁰Owoy mig-igsà ké ma ngadan sa medoo ulu-ulu da anì metulon ké diyà keniko, o Datù.

¹¹“Ini sa sagbì da, kagda gaa sa medoo etaw i Nemula, sa Nemula egsabà sa langit owoy tanà. Owoy egbaelan da gaa dulì sa Dalesan i Nemula sa igpebael sa datù da épê dakel egkegaga diyà sa tanà Islaél egoh anay.^d ¹²Tinulon da diyà kenami sa egoh sa medoo tupù da migpebulit si Nemula, sa Nemula diyà langit. Huenan di, igpesigkem di kagda diyà si Datù Nabokonosol tegeBabiloniya^e sa mig-uwit kenagda dutu tanà Babiloniya dò, agulé pinedaetan di ma sa Dalesan i Nemula. ¹³Agulé egoh sa muna palay egoh i Silo migkedatù diyà Babiloniya, igsugù di diyà kenagda gaa anì petigdegen da dema sa Dalesan i Nemula.

¹⁷“Huenan di, amuk mebaluy diyà keniko, o Datù, pepengauwi ko diyà sa etaw sa medoo tapay sulat diyà sa tanà Babiloniya amuk tuu sa kesugù i Datù Silo egpebael dulì sa Dalesan i Nemula dutu Hélusalém dò. Owoy egpegeniyen ké ma sa ketulon ko diyà kenami sa niko penemdem denu iya wé.”

^d 5:11 Si Datù Salomon sa datù tegeIslaél épê dakel egkegaga sa migpebael sa anay Dalesan i Nemula diyà sa menuwa Hélusalém. ^e 5:12 Iya sa kagi Hibelu, “sa datù tegeBabiloniya kedu diyà tanà Kaldiya,” dodoo Kaldiya sa sebaen ma ngadan sa tanà Babiloniya.

Ini Sa Egoh I Datù Daliyu Migsugù Sa Kepelagbas Da Eggalebek

(Isdela 6:1-8,11-12)

6 ¹Na, igsugù i Datù Daliyu tegeMidiya igpepengaa sa sulat diyà sa dalesan atung taguan sulat dutu Babiloniya dò. ²Hê, hinaa da sa sulat dinilin dutu menuwa Ikbatana dò diyà sa pelubinsiya Midiya.

Iya sa kagi nekesulat, guwaen di, ³“Egoh sa muna palay egoh i Silo migkedatù, igsugù di igpebael dulì sa Dalesan i Nemula dutu Hêlusalém dò. Iya sa Dalesan kenà da megay diyà si Nemula owoy sa kenà da ma megay sa atang ulowen. Sepulù owoy lima lipo sa kehagtaw di, owoy hediya ma sa kelabel di. ⁴Uman telu logsud sa dakel batu sangkap di, ahayan da dema kayu elet di. Na, iya sa ibayad langun iya wé sa pilak kedu diyà sa taguan pilak sa datù. ⁵Na, sa medoo sangkap bulawan ataw ka pilak kinuwa i Datù Nabokonosol diyà sa Dalesan i Nemula diyà Hêlusalém owoy inuwit di diyà Babiloniya egoh anay, pelikui yu diyà sa tapay kenà di diyà sa Dalesan i Nemula dutu Hêlusalém dò.”

⁶Na, egoh i Datù Daliyu migbasa iya wé uledin i Silo sa datù egoh anay, petow dé migpeuwit sulat. Ini sa kagi sa sulat di, guwaen di, “O Tatenayi sa ulu-ulu diyà sa pelubinsiya denu eledan agdaw amuk diyà ki sa lawa't wayeg Upelatis owoy si Sital Bosinayi owoy sa medoo duma yu ulu-ulu, yoko egbogo kenagda egbael sa Dalesan i Nemula. ⁷Pandayà yu dé sa ulu-ulu etaw Hudiyu owoy sa medoo kaunutan da anì mekelagbas sa kedulì da egbael sa Dalesan i Nemula diyà sa tapay kenà di. ⁸Owoy egsuguen ku ma kiyu egpebulig siini medoo ulu-ulu egbael sa Dalesan i Nemula. Bayadi yu sa medoo megastu da kedu diyà sa pilak etuken yu diyà sa medoo etaw yu eg-ugpà diyà sa pelubinsiya denu eledan agdaw anì endà meéngén sa kegalebek da.

¹¹“Na, amuk duen etaw umeked siini uledin ku, ini sa mebaelan di. Mekedan sa sebaen bugsud diyà sa dalesan di, owoy ideban, agulé idilek diyà kenagdi. Megubal sa dalesan di anì mebaluy daen lupuk. ¹²Na, si Nemula sa mighemilì sa menuwa Hêlusalém sa kenà etaw egpenemula kenagdi. Ungayà ku kagdi sa pedaet sumalà dé sa datù ataw ka kedatuan sa egkelukuy meluman siini uledin ku ataw ka gumubal sa Dalesan i Nemula dutu Hêlusalém dò. Aken si Datù Daliyu sa migsugù ini i, huenan di tigtu mepangunutan yu ini i.”

Ini Sa Egoh Da Migpeépê Diyà Si Nemula Sa Dalesan Di

(Isdela 6:13-18)

¹³Na, si Tatenayi sa ulu-ulu diyà sa pelubinsiya denu eledan agdaw owoy si Sital Bosinayi owoy sa medoo duma da ulu-ulu, tigtu da

migpangunut diyà iya wé uledin i Datù Daliyu. ¹⁴Hê, igpelagbas sa medoo ulu-ulu etaw Hudiyu sa kebael da sa Dalesan i Nemula, owoy migkebagel ma sa pedu da danà sa ketegudon sa duwa tegesugkow kagi i Nemula, si Hagiyo owoy si Sakaliyas tugod i Ido. Huenan di, neubus sa kebael da sa Dalesan i Nemula danà sa igsugù sa Nemula egpigtuuwen sa medoo tegeIslaél owoy danà ma sa igsugù sa medoo datù tegePélsiya, si Silo owoy si Daliyu owoy si Altahilis.^f ¹⁵Na, neubus dé sa kebael da sa Dalesan i Nemula egoh sa ketelu di agdaw diyà sa bulan pinengadanan da bulan Adal diyà sa keenem di gepalay egoh i Daliyu migkedatù.

¹⁶Agulé sa medoo tegeIslaél, lapeg sa medoo tegesimbà owoy sa medoo tugod i Lebi owoy sa langun etaw migpelikù kedu diyà sa neangayan da egoh da nesigkem, neanggan da temù egoh da migpeépê diyà si Nemula sa Dalesan di magtu binaelan da. ¹⁷Egoh da egsimbà, iya sa sinumbali da danà da egesalamat diyà si Nemula magatus tudu sapi, owoy duwa gatus mandangan kebilibili owoy epat gatus nati kebilibili. Owoy iya ma sa inimatayan da anì egpegeniyen da sa kepeuloy i Nemula sa salà da sepulù owoy duwa mandangan kambing tandà sa sepulù owoy duwa geumpung tugod i Islaél. ¹⁸Agulé sinebaedbaed da sa medoo tegesimbà owoy sa medoo tugod i Lebi danà sa galebek sa uman sebaen etaw owoy danà ma sa agdaw kegalebek da diyà sa Dalesan i Nemula, iling sa igsulat i Mosis egoh anay.

Ini Sa Egoh Da Migbael Sa Pista Sa Kinetalà Sa Kepigtamay I Nemula

(Isdela 6:19-22)

¹⁹Na, sa medoo etaw migpelikù kedu diyà sa neangayan da egoh da nesigkem, binaelan da sa Pista Sa Kinetalà Sa Kepigtamay i Nemula, egoh di neuma sa kesepulù di owoy epat agdaw diyà sa muna bulan^g diyà sa magtu palay. ²⁰Migpelanihlanih sa medoo tegesimbà owoy sa medoo tugod i Lebi, owoy metiengaw da dé diyà sa kehaa i Nemula. Agulé sinumbali sa medoo tugod i Lebi sa medoo kebilibili sa atang kaenen sa langun etaw migpelikù, lapeg sa medoo tegesimbà owoy sa medoo duma da tugod i Lebi.

²¹Agulé iya sa migkaen sa langun tegeIslaél migpelikù kedu diyà sa neangayan da egoh da nesigkem owoy sa medoo etaw mig-eked sa medaet adat sa liyu etaw eg-ugpà medapag diyà kenagda anì sumimbà da

^f 6:14 Siini Datù Altahilis, endà pa migkedatù di egoh da neubus dé egbael sa Dalesan i Nemula. Dodoo egoh di migkedatù dé, dakel sa ketabang di diyà si Isdela owoy sa medoo etaw Hudiyu. Basa ko Isdela kansad 7. ^g 6:19 Nisan sa pinengadanan da sa muna bulan diyà sa kalindaliyu etaw Hibelu, owoy iya sa lugay di kedu diyà sa teliwadaan sa bulan Malesu taman teliwadaan sa bulan Abelil.

daa diyà si Datù Nemula, sa Nemula egpigtuuwen sa medoo tegeIslaél.
 22Taman pitu agdaw egkeanggan da egbael sa Pista Sa Kekaen Da
 Sa Epan Endà Duen Ipelenuk Di. Neanggan da langun enù ka danà i
 Datù Nemula, huenan di egketuuwan sa datù tegeAsiliya diyà kenagda
 owoy tinabangan di kagda egbael dulì sa Dalesan i Nemula, sa Nemula
 egpigtuuwen sa medoo tegeIslaél.

Ini Sa Egho I Isdela Migtebow Diyà Hélusalém

7 1-5Na, egoh di migtalà pila dé gepalay sa egoh i Altahilis migkedatù
 diyà sa nesakupan tanà Pélsiya, duen sa etaw si Isdela migtebow
 diyà sa menuwa Hélusalém. Iya sa emà di si Salayas. Umemà Salayas i
 si Asaliyas, umemà Asaliyas i si Hilkiyas, umemà Hilkiyas i si Salum,
 umemà Salum i si Sadok, umemà Sadok i si Ahitub, umemà Ahitub i si
 Amaliyas, umemà Amaliyas i si Asaliyas, umemà Asaliyas i si Mélayot,
 umemà Mélayot i si Salahiyas, umemà Salahiyas i si Usi, umemà Usi i
 si Buki, umemà Buki i si Abisuwi, umemà Abisuwi i si Pinihas, umemà
 Pinihas i si Iliyasal, owoy umemà Iliyasal i si Alon sa anay Tigtu Ulu-ulu
 Sa Medoo Tegesimbà.

6Na, tigtu netiigan i Isdela sa medoo uledin i Mosis sa igbegay i Datù
 Nemula egoh anay, sa Nemula egpigtuuwen sa medoo tegeIslaél. Danà i
 Isdela sa tinabangan i Datù Nemula, huenan di igbegay i Datù Altahilis
 diyà kenagdi sa langun egpegeniyen di. 7Egoh sa kepitù di gepalay sa
 lugay i Altahilis migkedatù, miglegkà Isdela i diyà Babiloniya enù ka
 eg-angay Hélusalém dò. Mig-unut ma diyà kenagdi sa medoo tegeIslaél,
 lapeg sa medoo tegesimbà owoy sa medoo tugod i Lebi, owoy sa medoo
 tegeduyuy owoy sa medoo tegebantay, owoy sa medoo liyu tegegalebek
 diyà sa Dalesan i Nemula. 8-9Miglegkà da diyà Babiloniya egoh sa muna
 agdaw diyà sa muna bulan. Agulé danà sa ketabang i Nemula diyà
 kenagda, migtebow da diyà Hélusalém egoh sa muna agdaw diyà sa
 kelima di gebulan. 10Edung egoh di batà pelà, mig-udes Isdela i eg-inau
 sa uledin i Datù Nemula owoy pinangunutan di ma. Igtulù di ma sa
 langun uledin diyà sa medoo duma di tugod i Islaél.

Ini Sa Sulat I Datù Altahilis Diyà Si Isdela

11Na, ini sa kagi sa surat igbegay i Datù Altahilis diyà si Isdela sa
 tegesimbà owoy sa tigtu neketiig sa medoo uledin igbegay i Datù Nemula
 diyà sa medoo tegeIslaél.

12“Iya sa egsulat ini i si Altahilis, sa tigtu mapulù datù. Ini sa surat
 ku diyà si Isdela. Kagdi sa tegesimbà owoy sa tigtu metiig egselejang sa
 medoo uledin i Nemula, sa Nemula diyà langit.

13“Na, igsugù ku diyà sa medoo etaw tegeIslaél, lapeg sa medoo
 tegesimbà owoy sa medoo tugod i Lebi, sumalà dé sa kenà da diyà siini

nesakupan kedatuan ku, mebaluy da doo munut diyà keniko mangay Hélusalém dò, amuk iya sa ungayà da. ¹⁴Aken owoy sa pitu salu ku, neseunut sa penemdem ké egpeangay keniyu anì telowen yu amuk tigtu egpangunut sa medoo tegeHuda owoy sa medoo tegeHélusalém diyà sa medoo uledin igسالig sa Nemula yu diyà keniyu. ¹⁵Amuk mipanaw yu, uwit yu ma sa medoo pilak owoy sa bulawan igbegay ké uloy diyà sa Nemula egpigtuuwen sa medoo tegeIslaél, sa Nemula mighemilì sa menuwa Hélusalém kenà sa mapulù Dalesan di. ¹⁶Owoy lapegi yu uwit sa medoo pilak owoy bulawan mekuwa yu diyà sa nesakupan tanà Babiloniya. Hediya ma, lapegi yu ma uwit sa medoo ibegay sa duma yu tegeIslaél owoy sa medoo tegesimbà sa atang gamiten diyà sa Dalesan sa Nemula yu dutu Hélusalém dò.

¹⁷“Siini medoo pilak, iya sa ibeli yu sa medoo tudu sapi owoy sa medoo mandangan kebilibili owoy sa medoo nati kebilibili, owoy sa medoo palay owoy sa medoo wain, enù ka iya sa ibegay yu diyà sa atung kenà yu egbegay amuk sumimbà yu diyà siedò Dalesan i Nemula dutu Hélusalém dò. ¹⁸Amuk dumuen pilak ataw ka bulawan mesamà, mebaluy gamiten ko owoy sa medoo etaw ko diyà sa sumalà dé sa ungayà yu nekeunut diyà sa uyot sa Nemula yu. ¹⁹Owoy peépéi yu ma diyà si Nemula dutu Hélusalém dò sa langun taman igسالig diyà keniyu sa atang gamiten yu diyà sa adat kesimbà yu diyà sa Dalesan sa Nemula yu. ²⁰Amuk duen pa sa kulang langun taman yu diyà sa adat kesimbà yu diyà sa Dalesan i Nemula, mebaluy kumuwa yu pilak diyà sa taguan pilak sa datù.

²¹“O Isdela, kuna sa tegesimbà owoy sa metiig egselepang sa medoo uledin i Nemula diyà langit. Huenan di, sinasà ku sa medoo tegeipat pilak diyà sa pelubinsiya denu eledan agdaw tanà dutu sa lawa't wayeg Upelatis anì begayan da kiyu uloy sumalà dé sa egpegeniyen yu. ²²Iya daa taman sa ibegay da diyà keniyu, taman telu ngibu epat gatus kakilu daa pilak,^h owoy taman salagsà daa kakilu teligo, owoy taman magatus daa kalatà wain, owoy taman magatus ma daa kalatà lana olibu, owoy sumalà dé sa kedoo timus eg-ungayaen yu. ²³Sumalà dé sa igsugù i Nemula diyà langit denu sa Dalesan kenà etaw egsimbà diyà kenagdi, udesi yu pangunuti, anì endà bulitan di duu aken owoy sa medoo sumetugdug ma kumedatù diyà kenak. ²⁴Owoy igsugù ku ma endà dé mekebayad da buwis sa medoo etaw eggalebek diyà siini Dalesan i Nemula, iling ka tegesimbà ataw ka tugod i Lebi ataw ka tegeduyuy ataw ka tegebantay ataw ka sumalà dé sa tegegalebek dahiya.

²⁵“Na, o Isdela, danà sa milantek penemdem igbegay sa Nemula yu diyà keniko, gelal ko dé sa medoo tegeantang owoy sa medoo ulu-ulu anì ipaten da sa medoo duma ko tegeIslaél eg-ugpà diyà sa pelubinsiya

^h 7:22 Mapulù sangkap sa pilak, beken sa pilak ibeli ta ini egoh.

denu eledan agdaw tanà dutu sa lawa't wayeg Upelatis, owoy mepion amuk metiigan da sa uledin i Nemula. Amuk duen etaw endà meketiig sa uledin, tului yu ma kagda. ²⁶Sumalà dé sa etaw endà egpangunut diyà sa medoo uledin sa Nemula yu ataw ka diyà siini igsugù ku, petow dé mepigtamayan. Meimatayan, ataw ka mebilanggu, ataw ka mehemagawan, ataw ka mekedan sa langun taman di.”

Ini Sa Egoh I Isdela Mig-olò Si Nemula

²⁷Na, egoh i Isdela migsakem iya wé sulat i Datù Altahilis, mig-ikagi, guwaen di, “Meolò Datù Nemula i sa egpigtuuwen sa medoo tupù ta. Pinepenemdem di Datù Altahilis i anì upionen di sa Dalesan i Datù Nemula dutu Hélusalém dò. ²⁸Tigtu tinabangan i Datù Nemula aken, huenan di egketuuwan da diyà kenak sa datù lapeg sa medoo salu di owoy sa medoo ulu-ulu di épê dakel egkegaga. Pinebagel i Datù Nemula sa pedu ku, huenan di negaga ku eg-enggat sa medoo duma ku ulu-ulu tegeIslaél umunut diyà kenak pelikù dutu Hélusalém dò.”